



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10

Yangia anidakangma :



Tir Yimiyim



tiryimiyim@aolima

tir yimiyim

TAPAK 7



Adelaide International nung Barty asayatsü

Tanü Jaipur nung Congress-i Centre anema lokti senden agitsü



VOL. XIX NO. 65 (ADOK 65) DIMAPUR AMUNGNÜ (SUNDAY) LUCHII (DECEMBER) 12, 2021

₹ 5.00

Dec 20 nü NLA 'special session' alitsü

Dimapur, December 11, 2021 (TYO): Nagaland Governor Prof. Jagdish Mukhi-i December 20 anepdang 9:30 ako nung 13 buba Nagaland Legislative Assembly indang terbuba session alitsü ayongzükogo.

Chief minister Neiphiu Rio-i aniba Core Committee of the Parliamentary Committee on Naga Political issue ajanga December 9 nü Armed Forces (Special Power) Act (AFSPA) 1958 den Naga yimten teblemsü onük jembitsü atema one-day special session alitsü lemtetba sülen Governor-i iba sangdong agütsüogo.

NLA Speaker Sharingain Longkumer-ia December 16 nikongdang 1:00 ako nung provisional programme yanglutsü atema Business Advisory Committee senden ka amentsü jazükogo.

December 4 nü Mon district kübok Oting nung sepaitemi

civilian 14 tepsetba sülen Naga nung telok balalai state sorkar dang Assembly indang special session ka mena AFSPA agientsü atema telemetba agitsü ayongzükua liasü.

AFSPA agientsüba takhangba ya Northeast nung tanga teloktem aser politician temia pusema nungiter.

December 7 nü Nagaland Cabinet rondak senden ka amen aser idangji Nagaland nungi tanga AFSPA agienang ta India sorkar dangi zülutsü telemetba agia liasü.

Nagaland Cabinet-isa Konyak Union ajanga agütsüba takhangbatem President Ram Nath Kovind dangi abentsü lemtet.

Oting lendong atalokba sülen Nagaland sorkarisa December 7 nü anogo 10 nü Hornbill Festival athitsü telemetba agi.

Iba lendong atema Nagaland sorkari Special Investigation Team (SIT) ka tentetogo.

COVID-19 Nagaland: 3 dak putet & 7 taneptsü angu

Kohima, December 11, 2021 (TYO): Nagaland nung Honibarnü nisung 5 dak COVID-19 putet aser 9 taneptsü angu.

"Honibarnü Dimapur nung nisung 3 aser Kohima nung ana dak COVID-19 putet" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Tanü COVID-19 puteta alir nisung 9 taneptsü angu. Parnokji Dimapur nung 4, Kiphire nung 3 aser Kohima o Mokochung nung kaka lir. Nisung 32,151 nungi 30,284 taneptsü nguogo aser ibaji taneptsü angur 94.19% lir" ta pai ashi.

Tang nisung 101 anepaludar saka parnok 84 dakbo shirangba

yimya kecha mali, ta paisa shisem. "Hokolbar tashi nung nisung 750,238 nem COVID-19 vaccine indang dose 13,12,041 agütsüogo" ta State Immunization Officer, Dr Ritu Thurr-ia ashi.

"Vaccine agirtemji frontline workers 60,983, healthcare workers 16,004, arishi küm 45 ser tempur 211,877 aser arishi küm 18 nungi 44 tsüingda alir 461,374 lir" ta paisa ashi.

"Vaccine agirtem rongnungi nisung 561,803-i dose anaprong agiogo. Parnokji frontline workers 48,561, healthcare workers 13,531, arishi küm 45 ser tempur 175,797 aser arishi küm 18 nungi 44 tsüingda alir 323,914 lir" ta Dr Thurr-ia metetdaksü.

BAC senden Dec 16 nü amentsü

Dimapur, Luchii/December 11 (TYO): Nagaland Legislative Assembly speaker aser Business Advisory Committee (BAC) mendenbuba Sharingain Longkumer-i sangdong ka ajanga, December 16 nü 1:00 ako nungi tenzükua Committee Room, Assembly Secretariat nung BAC senden amentsü telemetba agiba metetdaksüogo.

Iba senden nung December 20 nü nungi tenzüküsü aliba 13buba Nagaland Legislative Assembly, Tenth Session (Emergent Session) atema Provisional Programme tem tembanga sensak asemtsü.

Iba senden nung BAC züngsem ajak tamakok maludaksüi arua shilem agitsü kasa sangdong ajanga metetdaksüogo.

Tai maketer tem aibelena khaset ta asüba magizüker: KU NSCN (K) nung 'K' ya Konyak masü Khaplant ta metettsüla



Mon district nung India sepaitemi tai maketba nisung 14 tashi khasetba kiralongraba mapa anema Tizit nung nübortemi tejashi sayua lokti senden ka tanü ayongzükua liogo. Iba senden nung parnokki India kilo kilonser aser India sepa kürakyanglu yanglur rongdok aser Armed Forces Special Power Act agienang ta takangba agütsü. India kilo kilonser Amit Shah-i tatar senden nung Naga nungertemji sepaitemi sot saka manen aoba agi khaset ta tiyazü osang metetdaksüba ajanga Naga nung ano tali tejashiba kümdaksüogo. (December 11, 2021)

Kohima, December 11, 2021 (TYO): Union Home Minister Amit Shah-i tatok meshitsüla aser AFSPA agientsüla ta Konyak Union (KU)-i tanü nenshia metetdaksüogo.

Mon district nung tai maketba civilian tem aibelena khaset ta ashibaji magizüker, ta parnokisa ashi.

"December 13 tashi mangyimba mapang onoki temeten meshiba atema India sorkari telanzüba magütsüra aser Armed Forces Special Powers Act, 1958 magienra, onoki district aser state adena oa inyaktüsü" ta Konyak Union Spokesperson, T Yanlem-i ashi.

mapatongtem reprangtsü aser tajitetba lira bangdakpur dangi abentsü ta Chakhesang nung lanurtemisa bangzüngogo. CYF-i mapang shia Chakhesang nung aliba tesemtem nung aliba office tem mita aotsü aser mapai aruba-maruba reprangtsü, ta parnokki metetdaksü.

December 11, 2021 nü Multi-purpose Hall Pfutsero nung amongba 13 buba Biennial General Conference nung o jembirji Planning & Coordination, Land Revenue and Parliamentary Affairs Minister Neiba Kronu liasü.

Minister Kronu-i Chakhesang lanurtem dang loktiliba jenjang tajungba akümsü atema shilem tajung agitsü ayongzük.

"Chakhesang nung nem ali rongsen aika moaja lir anungji iba

Sepaitemi parnok kümzüktsü (self defence) mechi nung injang khaloktsü ta Union Home Minister-i ashiba atema kuli kecha mali kechiyong parnokki tepsetba civilian tem ket nung kecha maliasü, ta paisa ashi.

"Parnok kiralongrartem ta ashitsü atema kechi kuli lir aser iba osangji kong nungi angu? 21 Para Commando temi meshisadangi mapa inyak" ta KU Spokesperson-isa metetdaksü.

"Parnoki ozü lanur 6 khaset. Parnoki gari nungi tasü mangtem agizüker tanga truck gari ka nung enok. Iba gari nung parnokki

tasü mangtem nung camouflage uniform semtsütsü merang aser tasü mangtem anasa prangpongtem yuja liasü" ta pai ashi.

Lanurtem ya tai maketer tem liasü aser parnok hopta piyong aayangba sülen Honibarnü kidangi meyipa arudang iba tia ajuru, ta Yanlem-isa metetdaksü.

"Ita ka tejakdang Manipur nung telungpurtemi amakdang Rifleman Khatnei Konyak tepset. Konyak nungeri linük atema taküm bendanga agüja tenzükba sülen civilian tem tepsetba ya tim asü?" ta paisa asüingdang.

(Maneni tapak 9 nung...)

Chakhesang lanurtemi Phek district anüktsü

Dimapur, December 11, 2021 (TYO): Chakhesang Public Organization (CPO) telongtet nung shikariba, arem arongba aser tangalen nungi ak bener aruba maneni noktangtsü ta Chakhesang Youth Front (CYF)-i metetdaksüogo.

CYF-isa Chakhesang nung lushi nung terenlok mapa inyakba ajak nung yariteptsü aser tetsükdaksü bentsür arurtem anema noktaksü ta metetdaksü.

CYF-isa Chakhesang Public Organization (CPO) ajanga nungloksüba mapa ajak inyaktüsü bangzüngtep.

Phek District nung ozüngi memelaba tax saruba aser terenlok mapa inyakba nung kija mesüra teloktemi tetsükdaksü bener arutsüba anema noktaksü. State aser Centre sorkartemi inyakba

mapatongtem reprangtsü aser tajitetba lira bangdakpur dangi abentsü ta Chakhesang nung lanurtemisa bangzüngogo.

CYF-i mapang shia Chakhesang nung aliba tesemtem nung aliba office tem mita aotsü aser mapai aruba-maruba reprangtsü, ta parnokki metetdaksü.

December 11, 2021 nü Multi-purpose Hall Pfutsero nung amongba 13 buba Biennial General Conference nung o jembirji Planning & Coordination, Land Revenue and Parliamentary Affairs Minister Neiba Kronu liasü.

Minister Kronu-i Chakhesang lanurtem dang loktiliba jenjang tajungba akümsü atema shilem tajung agitsü ayongzük.

"Chakhesang nung nem ali rongsen aika moaja lir anungji iba

ajanga agri & allied maparen inyaktüsü lenmang sadema lir" ta pai ashi.

"Sorkari Phek district nung gari lenmang mapatong balala inyakar anungji public-i akokba tashi yariteptsü ayongzük. Gari lenmangtem aser power shitak yanglura tanga tesem ajaklen terenlok alitsü" ta Kronu-isa ashi.

"Chakhesang nung tesem nung CYF-i two lane projects repranga inyakdaksüba atema tenüngsang agütsür. Maneni CYF-i nenok telongtet nung ozüngi memelaba tax saruba aziüktsü ayongzük" ta paisa ashi.

"Chakhesang Public Organisation (CPO)-i shikariba aser arem arongba noktangba ama CYF-i akangkanga inyaktüsü ayongzük" ta Minister Kronu-isa metetdaksü.

Kohima nung Langpangkong nung Hon jubilee amung



Langpangkong Senso Telongjem Kohima pur Hon Jubilee sentong nung Jubilee nüngo kaket Dr.Tali Imsong (achiji) ket nungi agizükua Wb.Tongpang Ozüküm, Minister, NPWD-i sayatsüba noksa nung angur. (Kohima, December 11, 2021)

Kohima, December 11 (TYO) : Kohima nung Langpangkong Senso Telongjem tentetter küm 50 ajungba Hon Jubilee benjongmung sentong Molu Ki, Kohima nung December 11 nü mungogo. Iba Jubilee mung sentong nung tongti O jembir, Wb.Mayang Lima, Upa Lokayukta-i jembidang, " asenok dak anguba nükla tasen ajanga nübortem jenjang tajungba kati anitsü asoshi asenok putepa aser jungtepa alitsüla," ta metetdaksü.

"Akhi tsüraburtemi tanü putu nung alir asenok janratema lidaksütsü asoshi

gari lenmang tua yutsüba aser school lapoka toktsüba mapa tajungtem jilu ajizükua tanü asenokia arok ajungtsü bilema inyaktüsübaji asen nükla asütsüla," ta paisa ayongzük.

Iba Jubilee mung nung tongti tejaoker, NPWD (Housing & Mechanical) kilonser, Wb. Tongpang Ozükümi jembidang, tanü putu nunga Aortem longjemer Naga nungertem asoshi yimten nung tongti shilem agia mapa tajung inyaktüsü merangteptsüla ta ayongzük. "Tesüba mapang inyaktetba mapa nung dang

asenok temulung lemer kazüba agi asenok tejakleni mouteter, anungji asenoki tanü asen teinyaktüsü khuret meteta tejakleni aotsü merangdi," ta paisa ayongzük.

Kasa sentong nungsa tetushi tejaoker Wb. Imnatiba, Advisor-i jembidang, "tanü putu digital lima kümadok nungji asen nübur tangatetba, tebilemba aser inyaksangji ajakji tensa den peta inyaksangshitsüla," ta metetdaksü, Paisa lenirtem rongnung nübortem asoshi yaritepa inyaka aotsü ajungshi.

(Maneni tapak 9 nung...)

Kohima Ongpangkong Kaketshir Telongjem Silver jubilee mungogo



Metsubo Jamir-i Kohima Ongpangkong Kaketshir Telongjem (KOKT) silver jubilee souvenir sayatsüba noksa nung angur.

Kohima, Luchii/December 11 (TYO): December 10 nü Molu Ki, Kohima nung Kohima Ongpangkong Kaketshir Telongjem (KOKT) silver jubilee mungogo. Jubilee ya "Foundation: Re-understanding" onük nung ajemdaker munga liasü.

Küm 25 ajungba mapang KOKT-i, tamendakdak angatetsü aser education, sobaliba aser rongsenketzung terenlok nung temaba jenjang atongtsü atema inyaksü asoshi "Foundation: Re-understanding" omen ya shima liasü.

Alakteta jaoker ama sentong nung o jembiba mapang Nagaland indang rural development minister Metsubo

Jamir-i, tetoktepba lima den liromedema aotsü atema education jenjang tajung koda tongtibang iba indang lemsatop. Paisa, kaketshirtem dang pei wadang nung tetoktepba tanüla benoka inyaksangshitsü ajungshi. Iba sentong nung tongti o jembirji Associate Pastor Mission Kohima Ao Baptist Arogo Imna Zulu Jamir liasü aser pai kaketshirtem dang pei tangatetba aser pei tinyaksü shidak lateta ayutsü ajungshi.

Jamir-isa, kaketshirtem dang mapang tatsüka tsungda ajangzüksüba aser mapang talangka agia ajangzüksü atema nukjidong ayutsü aser nukjidong atongtsü atema meranga

inyaksü ajungshi.

Iba sentong nung Kohima Ongpangkong Telongjem, Ongpangkong Kaketshir Mungdang aser Kohima Ongpangkongtsür Telongjem nungi ketdangsurtemi o tatsütsü jembia. Maneni sentong nung KOKT tir Emffu Longkumer-i lokti pelaa agizükba o jembia aser KOKT indang mezüngbuba tir Aoyanger Kichu-ia o tatsüka jembia liasü.

Kasa mapang nung KOKT jubilee bangzung ya bangzung luden convenor Er. Subongliba-i metetdaksü aser Planning Committee Convenor Er. Imsuyanger-i tepela anküp o jembia liasü.

Dimapur nungi team May-i NP Hackathon kokogo

Kohima, Luchii/December 11 (TYO): Dimapur nungi team May-i Information Technology problem solution on "Highway Security Management" onük benoka mezüngbuba Nagaland Police Hackathon kokogo.

Takok anguba team nung Rongbangmeren, Longtsusang aser Yangerlong Jamir nung liasü. Parnok nem senpet sen 50,000 den kuli kakat tajung agütsüo.

Kohima nungi Team Solvs nung Sujit Sonar aser Obed Jamir nati, solution for "Integrated check gate system" onük benok aser tanabuba jenjang angu aser NEILIT kaketshir Thejavilhou aser Chubalemba nati "Highway security" onük benok aser tasembuba jenjang angu. Telok anaprongla nem senpet sen 30,000 aser 20,000 ta agütsüo.

Iba tetoktepba nung shilem agitsü atema team 12 züngoksem aser team troki tatem tashi shilem agia liasü.

Sentong nung o jembiba mapang Director General of Police (DGP) T John Longkumer-i, lisopurtem tekümzükba kübok toktsütsü aser ochi obendang agütsütsü ya Police atema khuret tulu ka lir. Mezüngbo police mapaji ken o balala bushisingdangtsü liasü,

iba sülen lendong/azütokshi balala nokdangtsü liasü, saka tanübo lendong matalok tsungda jenjang agitsüsa kumogo, ta ashi. Tanübo lokti technology tsütsü kanga kara renloka aoba ajanga khurettem tali kumogo, ta pai ashi.

Technology ya ozüing alema inyakertermia amshir, ta shia police-a maneni renlokyonga aotsü nungdaker ta ashi.

Sangrasangji ajak indang tamendakdakji tebilemstü jangjatsü aser technology dak ajemdaker item tebilemstütem bentetsü asoshi lenmang bushitsüba ya lir, ta pai ashi.

Nagaland police-i, ozüing alema inyaksangshiba anema raratsü asoshi dang technology ajanga tebilemstü bentetsü atema lenmang bushiba dang masü saka nüburtem atema service balala agütsütsü asoshi technology amshir ta shia pai, Hackathon - "Invention Marathon" ya tarutsü nung police mapa atema mapang talangka asoshi tasa asatsü nukjidong nung ayongzük ta ashi.

Iba tetoktepba ya cyber technology aser sangrasangji balala ajanga bushisingdang, ozüing anema inyaksangshiba nokdangtsü/jelia putetsü atema teyari agütsütsü asoshi lir, ta pai ashi.

DGP-isa, ketdangsurtem

asir Nagaland Police sepaitem dang tarutsü nung ozüing alema inyaksangshiba achaayangba mapang technology aser science angatetsü nungdaker, ta ashi.

Tarutsü nungbo police inyakyimji jelia lazükba asütsü, ajisüaka meimchir sangrasangji kecha agi melentsü makok ta pai ashi. "Meimchir shisatsü ajanga inyakyim anitsüla aser inyakyim nem asenok manidaksütsüla," ta pai ashi.

Ketdangsur aser sepaitem nem training agütsütsü atema NIELIT den Nagaland Police-tenangzüktepba ka yangluogo ta metetdaksüba mapang Longkumer-i ketdangsur ajak dang iba maangka agitsü ajungshi, ajita asünungdang technology den liromedema Nagaland Police ainba dang masü saka nüburtem nem ochi obendang agütsütsü atema inyakyimtem jelia jangjatetsü, ta ashi

Maneni DGP-i takok angurtem nem tenüngsang agütsüba den iba amala mesükba hackathon ya tarutsü nunga tongtibang onüktem atema ayongzüksü ta ashi.

DGP Longkumer-i, Additional DGP (Law & Order) Sandeep M Tamgadde aser tanga police ketdangsurtem matsüngdang takokertem nem sempet agütsü liasü.

APC, Nagaland-i ICAR senden nung onük balala benok

Dimapur, Luchii/December 11 (TYO): December 11 nü Indian Council of Agricultural Research (ICAR) 25buba Regional Committee senden nung state tenüng nungi APC, Nagaland, Y. Kikheto Sema, IAS-i shilem agia liasü. Iba sentong ya Video Conference ajanga agia liasü.

Senden ya Dr. T. Mohapatra, Secretary, DARE & Director General, ICAR lenisüba nung agi aser India sorkar ketdangsurtem, Vice Chancellor tem, ICAR institutions tekolaktem, scientist tem aser North-East Region (NER) nungi Agriculture & Allied Department ketdangsurtemi shilem agia liasü.

Senden nung Kikheto-i, statehood ngur küm 59buba nunga Nagaland nung tetshitsüsa National mesera Regional Institute ka danga mali ta ashiba den onük balala benoka liasü.

Pai, State Agriculture Research Station (SARS) Yisemyong, Mokokchung nung College of Agriculture under Central Agriculture University (CAU) ka amenoktsü benoka liasü. Kikheto-i ashiba agi, state nung nütsünyongtsük shilem 70 bo aluyimba nung sendaka lir aser item rongnung shilem 73 tekonglu ayimba nung sotaka lir,

asir iba ajanga rongsenketzung nung tajangzük magütsür aser tzümpung atemaa majung. Ajisüaka tekonglu ayimba menokdangteter anungji Upland mesera Hill agriculture technologies nung specialize astüba College of Agriculture ka nungdaker ta ashi.

Paisa, State Soil & Water Conservation Training Research and Demonstration Instituteat Sechu, Zubza, Kohima nung Regional Centre for Soil & Water Conservation ka amenoktsü benok. APC-i ali aser tzü wazüka ayutsü nungdakba aser tzübo, spring sheds, tzüpokdak asingsashiba, tzünglu tzü bendenba, check dam amala yanglutsü nungdaker ta ashi.

Maneni pai, Zunheboto nung ak atema Regional Livestock Centre ka amenoktsü benok. Pai ashiba agi, Naga nungertem akshi kanga sapua achir saka küm nung sen crore 1,000 shi alang shi tangalen nungi bener arua achir, ta ashi. Anungji Zunheboto district nung Regional Livestock Centre amenoktsü nungdaker ta pai ashi.

Y. Kikheto Sema-isa, quality control facility densema Organic Hub ka amenoktsü aser Naga Integrated Settled Farming (NISF) amenoktsü atema benoka liasü.

State level Science seminar ayongzük agiogo

Dimapur, Luchii/December 11 (TYO): State Level Science Seminar, 2021, December 10 nü Directorate of School Education, Kohima, Mini Conference Hall nung agiogo. Iba sentong nung Principal Director, Directorate of School Education, Nagaland, Shanavas C. IAS tongti o jembir liasü.

Taküm Science Seminar indang onükji 'Boosting Immunity- The Need of the Hour, prospects and Challenges' liasü. Tetoktepba virtual mode ajanga agi. Iba tetoktepba nung Kohima, Dimapur, Tuensang, Phek, Kiphire, Peren, Wokha, Zunheboto, Mon aser Mokokchung nungi tetokteper 10-i shilem agi.

Sentong nung o jembiba mapang Principal Director-i, Science koda tongtibang iba indang lemsatopba den subject ka ama science ajanga kaketshirtem nem maangka aika agütsür, ta ashi.

Pai, wara pokteter aliba ajanga kaketshirtem iba sentong nung shilem magitetba atema sasaba lemsatop, saka tarutsü nungbo iba amala sentong ayongzük kaketshirtem nem maangka tajungba agütsütsü imlaba lemsatopba liasü. Pai ashiba agi, iba amala seminar aser exhibitions sentong ayongzük agiba ajanga kaketshirtem renloka aotsü aser tarutsü atema jenjang

yaglushitsü kechiyong iba ajanga parnok sasa dak temulung lemteta kümdaksür aser kati ka nungi angazükteper. Maneni pai, SCERT, NBSE, DSE amala line department tem longjemer inyaksü nungdakba lemsatopba aser iba amala tetoktepba nung shilem agitsü atema kaketshirtem ajungshitsü asoshi longjemer inyaksüla ta ashi.

Taküm seminar atema tetendangertem ji Deputy Director, School Education Emilo, Vilakhole, Research Associate, SCERT aser Dr. Rokovikho Dominic, Assistant Professor, Kohima Science College na liasü.

Tetoktepertem Tosovi Philip, GT (Science), GHS PWD-i anepalutsüba Google format nung aptitude test ka mezüng agi aser seminar nung shilem agiba den iba marks bendenlokja liasü. Iba tetoktepba ya Ministers' Hill Baptist Higher Secondary School, Kohima nungi Tsupongla S-i akok aser Wela Foundation School, Tuensang nungi Chaanglangla Y First Runner's up aser Jubilee Memorial School, Mokokchung nungi Arizongla Second Runner's up liasü.

Iba sentong ya Assistant Director, DSE, Visetonuo Angami lenisüba nung agi aser Jangsemba Tzudir-i tepela anküp o jembia liasü.



December 4, 2021 nü Nagaland kübok Mon district nung sepaitemi civilian 15 tepsetba anema All Manipur Students' Union (AMSU)-i Hokolbarnü Imphal nung lungkak aitba sentong ka agiba angur. Iba sentong ya North East Students Organisation (NESO) lenisüba kübok agi aser kaketshir aikati shilem agi.

Tripura sorkari Kolkata flyover amshiba atema opposition-i aitsür

Agartala, December 11, 2021 (Agencies): Tripura nung Honibarnü opposition CPI(M) aser TMC teloktemi Biplab Kumar Deb'er sorkar aitsüogo. Tripura sorkar indang official handle nung Kolkata indang flyover noksa ka amshiba atema parnoki aitsü. State sorkari tanga state tem nung terenlok mapa inyakba apua amshir ta opposition teloktemi ashi. Motor Vehicle Driving Regulations atema slogan writing competition ka nung Kolkata indang Sealdah flyover noksa amshiba atema parnoki state sorkar aitsü. Iba ajanga sorkari MyGov

Tripura handle nung noksaji agiena liasü. "Tripura nung BJP-i aniba sorkari West Bengal indang flyover amshia Biplab Kumar Deb'er sorkari terenlok mapa inyakba ama sayubaji maaksü mapa ka lir. BJP sorkari tanga state dang nungi apua noksa amshir" ta TMC indang state steering committee convener Subal Bhowmik-i ashi. Tripura nung BJP sorkari Kolkata flyover noksa amshia parnoki terenlok mapa inyakba ama sayur, ta CPI(M)-ia aitsü. Ajisiüaka, BJP-i opposition teloktem aija "parnoki tamajung dang bilema inyaksangshir" ta ashi. "Iba tweet ya national-level

competition dak sendakba liasü. State balala süaka gari lenmang sadema maliba indang sayutsüba liasü. BJP-ibo linük nung state ajak dena lira ma bilemer" ta BJP chief spokesperson Subrata Chakraborty-i ashi. Taküm September ita UP sorkar indang advertisement ka nung Kolkata nung Maa Flyover amshi. Yogi Adityanath'er sorkari terenlok mapa inyakba sayudang iba noksa amshia liasü. Taoba ita Union Ministry of Civil Aviation-ia West Bengal kübok Paschim Bardhaman district nung aliba Durgapur airport ya Uttarakhand nung ama sayua liasü.

ICMR-RMRC Dibregarh ajanga Omicron variant putetba kit yanglu

Dibrugarh, December 11, 2021 (Agencies): ICMR-RMRC Dibregarh nung telok kati ghonda ana tsüingda Omicron variant putetba kit ka yanglutetogo. ICMR-RMRC Dibregarh nung Senior Scientist Dr Biswajit Borkakoty-i aniba telok kati iba kit yanglutet. "ICMR-RMRC Dibregarh ajanga ghonda ana nung

Omicron variant (B.1.1.529) SARS-CoV-2 (COVID-19) putetba RT-PCR assay ka yanglutetogo" ta Regional Medical Research Centre, Indian Council of Medical Research (RMRC- ICMR), Dibregarh nung Senior Scientist, Dr Biswajit Borkakoty-i ashi. Iba ya kanga tongtipang lir kechiyong tang iba variant putettsü atema targeted

sequencing atema ghonda 36 aser whole genome sequencing atema anogo 4-5 shi agir. "Iba kit yagi SARS-CoV-2 indang Omicron variant tendangogo" ta pai ashi. ICMR-RMRC Dibregarh nung yanglutetba kit ya Kolkata nung amenoka aliba biotech company GCC biotech ajanga PPP mode nung yanglutsü. Iba ya 100% make in India lir.



Meghalaya sorkari Assam den arrtsü ken o tem atema regional committee ana tentet aser parnoki tanü Meghalaya Chief Minister Conrad Sangma ket nung reports agütsü dang agiba noksa angur. Deputy Chief Minister Prestone Tynsong-i aniba regional committee aser ano PHE Minister Renikton Lyngdoh Tongkhar-i aniba regional committee temi Chief Minister Sangma nem reports agütsü.

Tripura sorkari Buddhist university melar

Guwahati, December 11, 2021 (Agencies): Tripura sorkari Sabroom kübok Manu Bankul nung Buddhist university ka lapoktsü temelaba agütsüogo. Tripura sorkari Bahujana Hitaya Education Trust nem Letter of Intent ka agütsü ta osang angazüker. Linük 31 nungi kaketshirtemi iba university nung Buddhist literature, culture aser tradition angazüksü akok. Iba campus nungsa medical, technical aser general degree college tem lapoktsü sentong lir. "State sorkari Sabroom subdivision kübok Manu

Bankul nung Buddhist university lapoktsü atema Letter of Intent agütsüogo" ta Higher Education Director, Nripendra Chandra Sharma-ashi. Parnoki Detailed Project Report (DPR) ka tekaratiba nung agütsütsüla, ta paisa ashi. Iba dak sendakba maparen renemba sülen sorkari assembly nung bill ka benoktsü. "Buddhist telok nem university lapoktsü atema ali acre 25 agütsüogo" ta Sabroom MLA Sankar Roy-ia ashi. "Bilembe ama maparen renemra, ita ka ana tsüingda lung azüingtsü" ta paisa ashi.

Meghalaya nung arem shiruru mekhasettsü tesayuba agütsü

Guwahati, December 11, 2021 (Agencies): Aaranyak-i Meghalaya Forest department aser WCCB den yaritepa Northeast India nung arem shiruru wazüka ayutsü mapa inyaker. Parnoki Meghalaya nung Village Council züingsemtem den senden ka menogo. Aaranyak ya Northeast India nung biodiversity conservation organization ka lir. December 8-9, 2021 anogotem Shillong aser Nongpoh nung parnoki sendentem ayonga amen aser idangji yimdaklirtem aser village council 20 tema nungi village headmenaden.

"CWLW, Meghalaya, Sahay ajanga Shillong nung sentong lapoktsü. Iba sentong nung Anu James, DFO, East Khasi Hills aser Shillong o Nongpoh Range Officers aden" ta Aaranya-i sangdong ka nung ashi. Sentong nung mendenji WCCB, Sub-regional office Assistant Director, Jawaharlal Baro liasü. WCCB Intelligence Assistance Hiten Bora-i village council züingsemtemi arem shiruru tepsetba aziüktsüba indang onük jembi. Pai WLPA (1972) kübok ozüing aser arrla balala aliba indang metetdaksü.

Manipur nung gari 100 tema anenden



Imphal, December 10, 2021 (Agencies): Manipur nung tzüinglu kanga aruba aser anentsü kanga aluba ajanga Hokolbar nikongdang National Highway 202 A kübok Imphal-Ukhrul nung gari noklang ka tema anendena lir. Iba tesem nung double lane highway expansion mapa teinyakdak lir aser gari teimba

ka Litan aser TM Kasom village tsüingda anendena lir. Yashi nikongdang Public transport nung senzürtem ajak gari nungi alur külen tetsüing agi lenmang tamajung ajanga süi. National highway nung mapa inyakertemi anentsüh agientsü merang saka gari aika lenmang tom nung anendenba ajanga mapa sadema meinyaktet.

Mamata Banerjee-i Christmas matongdang Meghalaya semdangtsü

Guwahati, December 11, 2021 (Agencies): West Bengal chief minister Mamata Banerjee-i Christmas matongdang Meghalaya semdangtsü sentong lir. Meghalaya nung Trinamool Congress telok akangshitsü atema lai semdangtsü. Bengal chief minister Banerjee-i December 20 nü Assam atongtsü aser Kamakhya Temple, Guwahati semdangtsü ta osang angazüker.

Iba tasüingji lai Shillong-i aotsü aser idakji TMC maparen meyipa reprangshitsü, ta osang ajanga ashi. Mamata-i Meghalaya nung taoba chief minister Mukul Sangma dena TMC tanishirtem den senden amentsü. Meghalaya Assembly nung Leader of the Opposition Mukul Sangma den Congress MLA 11-i taküm November ita TMC nung adenba ajanga Meghalaya nung parnok tashi itshio.



TIR YIMYIM YIMOBILEM (EDITORIAL)

DIMAPUR AMUNGNÜ, LUCHII (DECEMBER) 12, 2021

Tamasa amangtsüla

Tsüngrem yimli nung asenoki kechi aginür ajak angutsü, saka itemji angutsü atema tamasa asenok teinyaktsü ka lir, iba teinyaktsüji, tamasa asenoki Tsüngremi agütsütsü ta amangtsüla. Atangji, Tsüngremi inyaktsü, Pai agütsütsü aser Pai nangzükba ama ataloktsü ta asüba nung amangtsübaji temang arakzuka asentsü alua, tenük agi ngua, teben agi amteta inyaktsüba mapa ka masü, saka temulungjang temerük nungi adoktsü. Nisung tsüngdangbo, Tsüngremi ashibaji aiben tamakoktsü amato asütsü saka Tsüngremi Pai nangzükbaji ataloktsü atema Pai asenok den jembitsü. Tsüngremi Mary den kotak tenyar Gabriel ajanga la mashisa akümtsü aser tanur ka asotsü aser paji chuba asütsü aser teti tatem makai yimsü asütsü ta metetdaksü. Tebur shinga dena memedem dangba aiür ka dang na tanur bona lir ta ashi nung, ashiko, aiür aikati jashitsü aser ain adoka langzüksü, kechiyong ibaji nisung asoshi tamamangtsü o lir. Ajisüaka, Mary-ibo oh! Aji Kibubai mulungba ka süra yamaji atalokdakjang ta tenyar dang ashiba asenoki Luke 1:38 nung angur. Aji tesüngmangtsüka lir. Ibaji tetsür tanur kati tapi langzükba o ka masü saka meshiteta aliba agi Tsüngrem sentong angatetter langzükba o ka lir. Ibri 12:14 nung ashir, " meshiteta melira Tsüngrem mangutsü." Tsüngrem sentongbo ajak renemer liasü aser Mary-i tamang agi Tsüngremer sentongji agizüksü asoshi dang ataba mapang ka kotak tenyar Gabriel ya la dangi adok. Aji oda, kodang Mary-i kotak tenyari bener aruba osang dakji amang, la ajanga Tsüngremi alima meimchirtem kumzüksü asoshi shinba o tem ataloktsü tenzük. Mary-i la shi tenük agi kotak mengudang aser kotak nung Tsüngremi sentong yanglubajia mangu aser mangashi. La tanur sor külena komaka timtem ajurutsüar lai kecha balaka bilema mao, saka lai metetba kaji, Tsüngremi kotak tenyar ajanga la den jembibaji shitak ta süksüka amang aser la ajanga Tsüngrem sentong ataloktsübaji aji teperi liasü. Tsüngremi kodang asenok den jembir, Pai asenok ajanga inyaktsüba sentong ajak renema yur külenang jembir. Aji oda, asenokji Pai tenyaba angar ka dang akümtsüla. Atangji, alima nung nisung shia dak mekokmein lir saka Tsüngremi temulungjang dang agir. Iba jagiang, Mathi 5:8 nunga temulungsentsü merüka alirtemiang Tsüngrem angutsü ta shia lir. Tsüngrem anguba ya asen tenük agi masü saka temulungjang agi angur. Temulungsentsü temerük tetezü temulungjang nung tamajung inyaktsü mebilemer aser tenük merem shisatsü khenyongi madoker. Iba temulungjangji koda topur tajung. Iba ama topur tajung temerük temulungjangji bushia Tsüngrem arur aser temulungjang temerük jagi temeshiba Tsüngrem o ji agizüktetter. Aji oda, Tsüngremi asenok dang nungi aginübajia temulungsentsü temerük aser Pai ashiba o nung amangba tamang aginür. Asenoki dang Pa dak amangra, tanüngbajibo Pai inyaktsü. Mary dang kotak tenyari la ajanga Tsüngrem chir ka asotsü ta metetdaksü dang, tarutsü nung la dak ataloktsüba aser lai ajurutsüba timtem aser temoatsü mapangtem indang mashi, saka lai odang amang aser lai ajuruba tensa mapang ajakji tamang ajanga ajuruba mapatem dang liasü. Iba amaji, asenoki Tsüngrem dak amangba ajanga tarutsü anogotem nung kechikoma tensa tia ka ajuruyonga aotsüar memetet, saka asenoki tamang dang amangra tensa tia ajakji Tsüngrem ajuruba mapang kumadoktsü. Asenoki amangba ajanga Tsüngremi asen taküm aser kibong nung tesüngmangtsü mapatem inyakba ama, asenoki nisungtem asoshi sarasademtsü dang, parnok taküm aser kibong nung tekümtet ajurutsüsa, anepadoktsüsa aser tepela angutsüsa ataloker. Item ajakji tamang mapatem lir. Tsüngremibo asenok asoshi ajak renemja lir, asenok mapaji Pa dak amangtsüba dang. Mark 9 nung kenü anogo tebu kati par jabaso suwar ka dak nungi temenen tanülatemji aridokdaksütsü Yisu dangi bener arudang, tanur tebu jagi Yisu dang, tang tashi nung pai Yisu dak mamangba agi par jabaso dak nungi nütsüngtemia temenen tanülatemji maridoktet saka tangbo Yisui temenen tanülatemji aridoktsütettsü ta amanger, anungji 'ni mamangba asoshi taidokang,' ta ashiba asenoki angur. Iba tsürabur yagi tamasabo Yisui masü saka nütsüngtemi temenen tanülatemji aridoktsütettsü ta bilem südi aser nütsüngtemia parnok parnok tanubusangji aneptsütettsü ta bilem südi. Tanü Yisui asenok aneptsüner aser jungdaksüner ser nung asenok majungbaji asenoki Yisu dak masü nisung dak amanger. Ajisüaka, Mary-i amangba amaji, kecha menemnem aser mejepjepi Tsüngrem dang asenoki 'Nai mulungba ama sang,' ta shitettsüsa asenoki Pa o aser Pa mapa nung amangtsüla. Iba tamang jagi dang asenoki Tsüngrem nungi tauchi, tashi aser temoatsü agizüktettsü.

OLEMSABANG

ABAM 150 Jubilee Mung Sülen Teinyaktsü Nükla

Matsüng Longkumer

(Yashi adok nungi...)

ABAM 150+ aser Tanela Anepaluba mapa

ABAM 150 sülenbo Lai aser arogo tesayuba nung tali temulung agütsütsü sendong yanglutsüla. Aor tamanger noklang nung 90bo baptist arogo saka ya kechiar memetet aser Lai tesayuba kimong memetetba/makar aika lir. Küm nung khen Revival jangraba aser khuret alidang Tsüngrem bushiba kisung yagi dangbo ABAM arogotem tanela tashi maitsü. Literature aser Education Ministry ya khen restructure sür rongsen teperi enoka tanela ainba nung yaritsü literature peria adoktsüla. Tat.agi, catechism class ya Baptist Arogo aika (talisa Naga lima arogotem) nung magir aser iba ya ajanga Naga nung Baptist tamanger aika foundation mali. Yangi tebilemstü tulu kaji lanurtem asen lima toktsür bendang lima university balala nung azüngdang tesayuba balala denchir aser foundation tajung mali nung item tesayuba balala ajanga asen lanur tajung aika anisaer.

ABAM 150+ aser Shisaliok Tenyaba mapa(Education)

Tamanger ka liromedema indaktsütsüji Arogo ka mapa. Liromedema ta kodanga südir yangi tanela, shi, shisatsü, molungsentsü, emotional, tekolok shisatsü ajak lir. Shisaliok tenyaba mapa ta kodang südir telemsa asem nung ABAM-i inyaktsü lemanga lir.

a. Christian Education Ministry

Christian Education Ministry (CEM) ya Arogo asoshi kanga tongtipang nükmen ta angateta tang tashi nung kanga junga bener arudar. Iba ya mapadong rongnung kangsa tongtipang ta angateta joko 150+ nungbo CEM ya jurila dedicated ministry ka yanglu nung kanga ajangzüksü. Iba dak sendak nung asen Aor sobaliba aser Ao Arogo tensa den apet curriculum yanglutsü kanga tetemtsü mapang lirta angateter. Asen kidanger Mungdang kar nungbo joko Postcolonial theology dena Sunday School nung tesayuba agütsür. Joko alima kanga kara ainer, aser aseni aginü-maginü ta mali university balala nung lanurtem azüngdang tesayuba balala ajurura parnok tamangba anokshitsür. Iba ama nungi kumzuka ayutsü asoshi Sunday School nung foundation tajung densa den apet yangertsü nungdaker. Apijemtsü Shin 22:6 nung ashiba ama "Tanur ka pei aotsüba lemang nungji sayutetang; aserparnok tain akümdang iba nungi mepilatsü."

b. Theological Institution

Arogo anepalutsü asoshi Tsüngrem O angazükdak mongjen ya kanga tongtipang lir. ABAM kübok Tsüngrem O angazükdak mongjen ana tashi, Impur Bible School (IBS) aser Clark Theological College (CTC), yateta küm jendi lenir aika moluteta arudar. Iba mongjen ana ya ken junga anepalutsü mapang ta aikati lemsa liasü. IBS ya upgrade asütsü nungdaker. Vernacular language aser English medium ana prongla course agütsütsü kanga ajungtsü ta bilemer. CTC ya ano junga khen repringshitsü nungdaker. Faculty kanga junga develop süa odagi, saka library development nung khen temulung agütsütsü lir. Iba den külemi IBS aser CTC ya loktep nung (amalgamate) ajungtsü südi ta kari shisem. Tena ya loktep nungbo IBS nung azüngertem exposure anguba den IBS jia ano jenjang ka ajungketer asütsü. Tena ya kodang loktepdar IBS campus, Impur lima, ya Ao Arogotem asoshi Resource Mobilization centre akümtsü ana nung dang lir. IBS aser CTC senteper Pastoral Refresher Course mesüra Youth resource/training centre lapoka Arogotem yaritsü lemang bushitsüla. CTC nung Senate of Serampore dang masü tanga Accreditation dena agütsüba campus asü nung koda? D.Th aser D.Min ama course-a anemloksü kanga ajungtsü.

c. Secular Institution

Tamanger ka liromedema aintsü asoshi shisatsü aser tangatetba tajung agütsütsü nungdaker. Aolimadang Land of Pioneer ta ajar saka repringdangra iba nungja ya otsü dang kumogo ta aikati nemjemer. Iba ya asenok ajak khuret lir. Mokokchung District ya shisaluymdak tesem (Education destination) kumadoktsütsüla. Tanü tashi nung Aor litsü nung BA dang graduate sütetter. ABAMi achayanga Aor litsü nung shisamuludak/angazükdak tajung lapoktsü kanga nungdaker ta YSS sabang nung tebilemba aikati lemsatet. Asen Aor litsü nung secular education asoshi top class college nungdaker. Clark Memorial Higher Secondary School ya danga junga khen molushi nung koda? ABAM 150+ nungbo CMHSS ya mission nung tongtipang ranglokdak sür university tashi ajungkettsü policy kar yanglu nungbo koda jungla? Asen lima shisaliok riju (institution) aser university tajung maliba yong lanurtem bendang leni aotsüsa akümer aser ibai ajanga aisü nung, talisa lim arogotem nung, tetsükdaksüajurur. Talisa Ao Arogotem nung sannüker tebilemstü tulutiba kaji tanur shisaluymdak ya lir. Iba yongji sannüker aika kibong balala alitsüsa adoker. Ao Arogo nung tenzüker chirtem CMHSS nung azüngtsü ajungshitsüla aser arua züngdaksütsü asameyang yanglutsü. Iba ya ajanga tebilemstü aika samatsü.

ABAM 150+ aser Shi Temang Anepaluba (Medical Health)

Nisung ka shi nung anema alibaji Arogo aser lokti asoshi tongtipang. Tanela den külemi shi anepalutsüji Arogo ka teinyaktsü mapa. Yisu pa alima nung alidang tanela nung dang masü shi nung shiranger taneptsü agütsüba asenoki meteta kar. Iba tangatetba nung America nung medical missionary arua asen lima hospital tenzükba tanü asenok tajungzük jendi angur. Tat.agi, 1900 nung Ida Scudder-i Christian Medical College, Vellore lapokba, mesüra Dr. J.R. Baileyajangalmpur Christian Hospital 1912 nung tenzüksü. Iba Hospital ana tsüngda küm 12 tepila dang lir saka CMC Vellore ya India nung ajaki sabua sendenba nungtoko hospital ka kumogo. Asen ICH ya koda asü aser koda asütsü?

Mokokchung District nung Hospital tajung maliba ajanga tapayutsü taküm aika anujungi asüba asenoki ajangshir. Iba den külemi bendang lima rongsen jendilaluba den, aiben sen apur, rongjenseta shikmani agiba ajuruogo. ABAM 150+ nungbo iba yatongtipang tenyaba mapa rongnung ka sür ao nung kanga ajungtsü. Tat.agi, Impur Christian Hospital ya Medical College level tashi yaktasa ajungkettsü nükla ayu nung ajungtsü. Christian Medical Association mesüra corporate Hospital kar den longjemer ICH ya multi-speciality aser research hospital jenjang yanglutsüla. Yamaji takok ngua inyaktsü lemang peria dang lir. Ibai ajanga Aor dang masü temeket kin aser bendang balala tejangzük angutsü. Tesem tezü anungji shiranger marur ta kari bilema temulung ilaa alitsü akok saka facilities tajung agütsüra shiranger arutsü shisabulu mali.

Iba ya kodang junga amenlokdir lemang aika nung teyari angutsü. Tat.agi, shi nung taneptsü anguba dang masü saka pastoral clinical counselling mesüra psychological counselling training agütsütettsü, mental health anepalutettsümesüra rehabilitation center ama a.a. lapoktettsü.

Otem

Iba ya kanga tongtipang kechiba süra Jubilee ya nisungi puratetba mung ka masü saka Tsüngremi nungloksüba amung ka lir (Levi 25:10). Anungji ABAM 150+ nung kechi inyaktsü, koloni aotsü, mesüra mangdang kechi asütsü ta asüadang nisungi molungba masü mesüra sobaliba agi alena ayuba masü, saka Pa sentsüwangshi asoshi Tsüngremi kechi inyakdaksüner ta tamanger ajaki sarasadema shisadangtsüla. Iba ocet nung aliba ya tetuyuba ka masü mesüra meinyaker ta ashir masü mesüra tesa khenyongi tasen bener aruba masü saka inyaka aliba, aser mayimjemi alibatam tajungba bener aotsü asoshi shisa lemsatetep dang.

ABAM 150 sesquicentennial mamung tashi aser mung külen ABAM ajanga Tsüngremer wadang tuluba nung bener aotsü tamanger ajak sarasadem südi. Amen.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Pennsylvania nung Tenla kidang Satan otem zülua toktsü



Luchii/December 11, 2021: Pennsylvania nung aliba Arogo ka Tenla kidang mejangjaba nisung kari satan noksatem aser otem zülua toktsü.

Hokolbarnü Lititz Church of the Brethren Tenla kidang atalokba ya tang bushisüngdangdar.

Lititz Borough Police Department nungi ketdangsertem Tenla kiji tonga aruba mapang nung Tenla kidang "Satan tushiang," "Tsüngrem tepsetang," aser "666" ta zülua toktsür aliba angu. Iba dak alia satan temaitsü 'pentagram' noksa-a ka liasü.

Police-i sangdong ka ajanga, "Noksa aser o zülutemji Tenla ki tesülen jara, atem aser table nung zülur liasü," ta metetdaksü.

Ketdangsertem ashiba agi, December 3 aonung aser December 4 anepdang züngia mejangjaba nisung kari Tenla kidang satan otemji zülua toktsü.

Osangbener den jembidang Arogo nung tongti pastor, Eric Landram-i, taoba mapang nung ozü Arogo nung iba ama ya kodanga matalokdang, ta metetdaksü.

Paisa, "Iba ya Arogoi süoki ia magir, aser tebilemstsü

makar," ta ashi.

Iba tatalokba sülen anogo ishika dang lir Washington D.C nung aliba National Shrine of the Immaculate Conception Tenla kidanga nisung kari kürakyanglu ka raksatsü aser kürakyanglu teka auyar ao.

Taoba ita nunga DeLand, FL nung aliba Tenla ki asem raksaja liasü.

Yaküm May ita nungi tenzüka taküm May (küm ka tsüngda) tashi nung US kübok state 29 nung Tenla ki aser Arogo meyong kiojen raksatsüba tatalokba 113 tashi liasü.

Karnataka nung Khristantemi anti-conversion ozüng anemer

Mumbai, December 11 (Agencies): Tang India kübok Karnataka state assembly nung anti-conversion ozüng ka benoktsü lia state nung Khristantemi iba ozüng anema nokdakdar.

December 13 nü Karnataka legislative assembly tenzüksü aser iba mapang nung BJP-i aniba sorkari anti-conversion ozüng benoktsü tebilemba lir.

Bangalore nung tongti putir aser All Karnataka United Christian Forum for Human Rights nung tongti, Peter Machado-i, iba bill nung ya lendong keta lir, ta metetdaksü.

Peter-i sangdong ka ajanga, "Anti-Conversion Bill tongti nukjidongji minorities anema inyaksü atema lir. Minorities aser secular telok ajaki longjemer iba bill anema ola adoktsüla," ta ashi.

2014 küm nungi tenzüka Karnataka nung BJP sorkar lir. BJP ya Hindu nationalist telok-Rashtriya Swayamsevak Sangh (RSS) den tesendaktep aliba yimtenren party ka lir.

India kübok state aika nung anti-conversion ozüng nung ajemdaker Khristantem aser Muslim nung nem tai tongloktsür, aser iba ozüng kübok aibelenertem dang senchi achiba dang masü saka jail nunga puoker.

Peter Machado-i, "Pai (Shekhar) aser tangartemi ashiba ama nisung aika

Khristan yimsü dangi meyiper, ta jembibaji shidak süra state nung dang masü saka linük nunga Khristan nütsüng kanga renloker lila," ta ashi.

Paisa, 2001 küm India nung Khristan nütsüng shilem 2.34 liasü saka 2011 küm nungbo shilem 2.30 (tajemba) dang aküm. Karnataka nunga Khristan nütsüng shilem 1.91 liasü saka tangbo shilem 1.87 dang kümogo, ta metetdaksü.

Machado-isa, tanga state tem nung anti-conversion ozüngtem benokba ajanga Khristanem reshikangshiba aser amokmerenba kanga bulua kümogo, ta ashi.

"India nung Anti-Conversion Law ya mezüng 1967 küm Orissa [tangbo Odisha ta ajar] nung benoka liasü. 1970s mapang nungi Khristantem anema inyak tenzüik aser 2007-08 kümtem nungbo Khristan aika tepseta liasü. Item ozüng ajanga Khristantem amaksü atema temeden agütsü," ta Khristan putirisa metetdaksü.

2008 küm August ita nung Odisha kübok Kandhamal district nung Khristantem anema apusoba mapang nung nisung 100 dak tema asü, meyrjang aika yiru, Tenla ki 300 aser ki 6,000 dak tema raksatsü aser nisung 50,000 shi jenshia liasü.

"Odisha nung Anti-Conversion Law agizükba sülen tanga state 6 nunga kasa ozüng agizük. Ibayongji item state

ajunga nung Khristantem anema inyakba bulua aküm. Tanübo state aser union territory ajak nung Khristantem anema inyakba kuli tejangja lir. Iba ozüng ajanga tensa ano tamajungba dang akümtsü," ta paisa metetdaksü.

Machado-i, kangshia tamangba yimsü meyipdaksür, ta jembibaji khenyongi tai; yimtenren lenirtemi iba ozüng benoknüba agi yazü jembir, ta ashi.

"BJP lenirtem aika Khristan school tem nung azüng aser medical treatment agitsü atema-a Khristan hospital tem ang bushir. Parnok shinga kangshia tamangba yimsü memeyipdaksü," ta pai ashi.

"Karnataka nung Khristan ajaki longjemer Anti-Conversion Bill anema ola adoker," ta paisa metetdaksü.

Taküm küm tetenzüklen BJP MLA, Goolihatti Shekhar-i, state nung mesüzüka mesüra kangshia tamangba yimsü meyipdaksüba kanga bulua atalokdar, aser par constituency nunga tetsü densema nisung 15,000 nungi 20,000 shi Khristan yimsü dangi meyipogo, ta metetdakja liasü.

Iba sülen par district nung item kuli bushshisüngdang saka kangshia Khristan yimsü dangi meyipdaksüba kuli kata mangu, kechiyong Khristan aikati, parnoki Khristan yimsü dangi meyiptsü atema pei sasa melungtet, ta langzüa liasü.

ANOGO ABEN TSÜNGREM DEN

JUNGGUNGA MEYOKTEP

"Aser ochi nungi parnok tenarong meyipa otsü dangi aotsü, ibala mapang arutsü. Saka nai ajak nung teshisadang liang, timtem aremang, sayutsüngir mapa inyakang, ne tenzüka mapa abensajang!" (2 Tim. 4:4,5).

Yohan Baptitsüba pa mapa nung kanga nendaka jangraba tenzüker ka liasü. Kwikati Yohan ama tenzüker parnok ajak Yisu sülen anidakertem aküm. Tanü azüngba Lai nung ajemdaker Yohan Baptitsüba aser tanü Khristan tenzüker temetemdangba kar agütsür.

1. Yohan tetsü pok nung alidang nungi Tanela Temeshi agi sünga liasü, saka tanü sayutsüngirtemi shirnok teperi ogo parnok tanela den sendaktep. Tsüngrem O pa dangi aru (Lk. 3:2); saka parnok dangi jungkai adokba aika zülua aliba Tsüngrem O den meputep. Pa lisem lima nung alir ka, nungtuku aginüba ajak nungi pilaa liasü, mepushi (Mt. 3:1); saka parnoki yimti nung alitsü meimer, aser konang bushir.
 2. Yohan Tsüngrem nungi aruba ola ka liasü (Yn. 1:23), saka tawa tanü sayutsüngir temesüktep kar ola ongetang lir. Pai tenla sapang mebushi saka nisungtemi pa bushi anungji pa osangji tangar den memeyoktep (Mt. 3:5, 6); saka parnok tenla sabang bushirtem lir aser parnok sayutsüngi dang parnok osang tajang masür aser tanaben majar.
 3. Kodang nisungtemi pa nungi angashi parnok temenen nungi temulung meyip (Mt. 3:6); saka kodang nisungtemi parnok nungi angashir parnoki parnok nem tenüngsang agütsür. Pai obendangba yakta arutsü ta ashi aser tangashirtem kümdangdaksür (Mt. 3:10); saka parnoki tarutsü temoatsü, azükaru indang jembir aser parnok temulung lemdaksü.
 4. Pai temulung memeyipba yimsü nung lenirtem dang per chirtem ta aja (Mt. 3:7); saka parnoki temulung memeyipba lenirtem dang parnok tashi mait aser nungdak mashir.
 5. Yohani Alima Tesangwa asoshi kuli asü (Yn. 1:8,9), saka tawa tanü ainkartemi mangdang nung asüakümer. Pai Yisui temenen bener Aosang aser Temeshitetsür ta sayu (Yn. 1:29; Mt. 3:12); saka parnoki Yisui tebilemstsütem Bentetsür ka dang ta sangtonger.
 6. Pai sayatenya kecha meinyak saka Kibuba asoshi nüburtem renemdaksü (Yn. 10:41; Lk. 1:16,17); saka parnoki sayatenya nung jangrar aser nisungtem memelenshi toktsür. Pai nüburtem dang parnok akaba nungi noklang shilem nung tenembo sensaker nem agüjang ta ashi (Lk. 3:11); parnoki nübur dang parnok ter shilem agüjang ta ashir aser parnoki temoatsü aginüra tenla agüjang ta zülur.
 7. Chubai nüktapangtaba asoshi pai chuba arutsü (Lk. 3:19-20); parnoki ochi mashi politician nem tenüngsang agütsür aser parnok maangka bushia sübokrem agütsür.
 8. Pai ashi, "Pa (Yisu) ulutsüla, saka ni asotsüla" (Yn. 3:30); saka parnoki Yisu tenüng nung parnok dak rangloker. Pai Pa nütsüngtem dang sarasademtsü sayu (Lk. 11:1); saka parnoki parnok nütsüngtem dang kechisarena ajak ratetta zülutsü, atangji tenlaa dena, ashir.
 9. Pai chiyongtsü tongmelang chiyongtsü chiyong aser tongmelang sobutsü sobu (Mt. 3:4); saka parnoki lalushibonga sobur iba jagi tongmelang tamanger ratadaksür.
- Ni alidak Yohan Baptitsüba ama tongmelang taküm lia Alima Tesangwa asoshi ochi kuli süa alitsü yariang, Oba. Amen.

YouVersion Bible App nung Lai azüngba shilem 24 agi timba kümogo

December 12, 2021: Yaküm zülua lir, "Tamasa Tsüngrem coronavirus wara ajanga alima yimli aser Pa temeshiba nung Laishiba azünger aika bushiang, aser item ajakji nü aküm aser iba wara nem agütsütsü." Iba Lai ya süngiemyonga 2021 küm nunga nisungtemi kanga lemsatapa Lasihiba azüngertem maneni liasü.

2020 küm March ita nung timba akümer, ta Bible app- nisungtemi Tenla kidangi YouVersion osang ajanga moutettsüsa akümdang hopta metetdaksü. shia iba app nung Lai azüngba Coronavirus wara shilem 10 agi timba aküm, iba metenzükdang anogo shia sülen hoptatem nung ano timba YouVersion app nung Laishiba aküm. Tenla kitem tanaben azüngertem den medemdangra lapok tenzükdang Amongnütem 2021 küm tashi nungbo iba app nung Lai azünger shilem 24 agi timba kümogo, ta parnoki metetdaksü.

YouVersion app nung Plans with Friends feature 2021 küm iba app nung with Friends feature bendenlokogo, aser iba feature nisungtemi Lai tapu billion 55.8 ajanga medemertem tsüngda züngogo aser audio ajanga Lai kasa Lai azüngtsü sentong tapu billion 8.2 angaogo. YouVersion-i Hombar nungi yangluteter.

Honibar tashi anogo shia Lai "Yaküm Lai azüngba yimya azüngertem asadanger aser sübaba sülen maneni nisung Amongnübo iba app nung Lai aikati taküma Lai kanga sapua azüngertem kanga agi timba, ta azüngba atema onok pelar. YouVersion-i ashi. Parnoki Tsüngrem den tesendaktep ano tajungba nisungtemi kanga sapua yanglutsü atema Lai azünger," ta azüngba Lai tekongji Mathi 6:33 YouVersion tentetsang, Bobby liasü; iba Lai tekong nung yamai Gruenewald-i metetdaksü.

Küm ka longkak aitba sülen aluyimertem kidangi meyipa aoer



New Delhi, December 11, 2021: Aluyimertemi Singhu arrtsülen küm ka piyong aluyimba ozüing tasen asem anema longkak aita aruba sülen Honibarnü parnoki iba tesem azüingttetsür aliba noksa nung angur. Sorkari aluyimertemi akhangba onük ajak agizüksü, ta nangzükba sülen aluyimertemi longkak aitba anener kidangi meyipa aoer.

New Delhi, Luchii/ December 11 (Agencies):

Yaküm November ita nungi tenzüka aluyimertem Delhi arrtsülen adenshir aluyimba ozüing tasen asem anema longkak aita aruba sülen Honibarnü aluyimer meyirjang aika pelatepa pei khu oshir pei kidangi apusoa ogo.

Tawa Ato kilonser, Narendra Modi-i, sorkari aluyimba ozüing asemprong agientsü lemtetogo, ta sangdongba sülen anogo ishika lir item ozüing asem agientsü atema Parliament nung bill ka benoka agizükogo. Ajisüaka aluyimertemi maneni tanüingba takhangba onüktema ajak agizüksüla, ta shia longkak aitba manen.

Yakünü Centre sorkari shidi ka ajanga aluyimertem dang aluyimertemi akhangba onük ajak agizüksü, ta nangzükba sülen aluyimertemi longkak aitba anentsü lemteta liasü. Ajisüaka sorkar inyakyim asadangsü atema taruba ita

aluyimertem senden ka amentsü.

Aluyimertem lenir, Balbir Singh Rajewal-a kidangi meyipa aodang Shambhu arrtsü nung pelaa agizük aser pai iba takok anguba atema aluyimertem nem tenüingsang agütsü.

Shambhu arrtsü nung osangbenertem den jembidang pai, "Ni Punjabi nunger aser linük nübur ajak nem tenüingsang agütsür. Tongbang tuluka kokogo. Iba dak alia aluyimertem pusemer ajak dang ni pelaba lemsateper," ta metetdaksü.

"Onoki tongbang ka kokogo. Centre sorkari apudaktsüsa aküm," ta pai ashi.

Rajewal-isa, Centre anema longkak aitba mapang asür aluyimertem nem akhüm agütsü.

Küm ka piyong aluyimba ozüing asem tasen anema longkak aita arudang aluyimer 700 dak tema süogo, ta pai metetdaksü.

Honibarnü aluyimertem meyirjang aika tractor trolleys aser tanga garitem nung pei kidangi meyipa aoba ajanga Delhi-Ambala aser Delhi-Rohtak national highways nung traffic timtem tulu adoka liasü. Punjab aser Haryana nung pei kidangi meyipa aoba mapang aluyimertem, talisa lanurtem aser tetsürtemi tsüingsangtepa liasü.

Punjab anasa Khanauri nung yimdaklirtem meyirjang aika adenshir aluyimertem agizüka liasü. Iba dak alia toll plazas aser tesem balala nung lokti tulu adenshir aluyimertem agizük.

Honibarnep Delhi-Uttar Pradesh arrtsülen Ghazipur nung aluyimertemi sarasadem sentong ka agiba sülen longkak aitba tesem toktsür apusoa liasü.

Karnal anasa Bastara toll plaza aser Ambala anasa Shambhu arrtsü nung aluyimertem agizük aser parnok atema chiyungtsü renemtsür liasü.

India nung coronavirus agi teshirangdakpur 93,277 dang kümogo

New Delhi, December 11 (Agencies): India nung ano nisung 7,992 dak coronavirus putet aser tang tashi nungbo linük nung nisung 3,46,682,736 dak iba tashidak putetogo, ta Honibarnü Union health ministry-i sangdong ka ajanga metetdaksü.

Tesüiba ghonda 24 tsüingda linük nung coronavirus agi

shiranger 393 asü aser tang tashi nungbo linük nung iba tashidak agi shiranger ajak senteper 4,75,128 süogo.

Tesüiba anogo 44 tashi linük nung anogo shia nisung 15,000 den tajemba dak iba tashidak puteta arudar, ta Hehealth Ministry-isa metetdaksü.

Tang linük nung coronavirus agi teshirangdakpur 93,277 dang

kümogo, aser ibaji coronavirus caseload nungi shilem 0.27 dang lir.

Tang anogo shia coronavirus samples tendangba nungi positive putetba shilem 0.64 dang kümogo aser hopta shia positive putetba shilem-a 0.71 dang kümogo.

Tang tashi nung India nung coronavirus vaccine dose crore 131.99 dak tema agütsüogo.



December 11, 2021 nü Bengluru nung aliba Yelahanka air base nung Army temi asür, Lance Naik Sai Teja nem akhüm agütsüba noksa nung angur. Bodhbarnü Tamil Nadu kübok Coonoor nung IAF chopper tsükokba lendong nung Lance Naik Sai Teja aser Chief of Defence Staff, Bipin Rawat na densema nisung 13 asü.

Taliban-i yimsüsüba Afghanistan linük nem India-i teyari agütsü

New Delhi, December 11 (Agencies): Afghanistan nung Taliban teloki sorkar akümba sülen tang mezüing India-i Afghanistan nem mozü balala touzük metric ton 1.6 agütsüogo.

Honibarnü medical supplies ji Afghanistan nungi aruba tayimtsü ka nung bener yok.

Hokolbarnü Afghanistan yimtüba, Kabul nungi India nunger 10 aser Afghan nunger 94 tayimtsü ka nung Delhi-i tonga aruba sülen Honibar kasa tayimtsü nungji medical supplies bener yok.

Item teyariji India nungeri agütsüba sempet, ta shia Afghan ambassador, Farid Mamundzay-

i, India nungeri bener yokba mozütemji Kabul tonga aruogo aser tang ama tensa ka nung item teyari ajanga Afghan nunger kibong aika yaritsü, ta metetdaksü.

India Ministry of External Affairs (MEA)-i, item mozüji Kabul nung aliba World Health Organisation (WHO) ketdangsertem ket nung agütsütsü, ta metetdaksü.

MEA sangdong ka ajanga, "Tang Afghanistan nung nüburtem timtemba mapang nung tanü India sorkari Afghan nungi aruba tayimtsü ka nung medical supplies bener yoker," ta metetdaksü.



December 11, 2021 nü Kolkata nung Trinamool Congress Lok Sabha MP, Sudip Bandopadhyay, TMC General Secretary, Partha Chatterjee aser party lenirtemi Kolkata Municipal Corporation elections atema party manifesto sayadang tangokba noksa nung angur.

Tanü Jaipur nung Congress-i Centre anema lokti senden agütsü

Jaipur, Luchii/December 11 (Agencies): Amongnü Jaipur nung Congress party-i lokti senden tuluka ayongzükba agütsü lia Honibarnü Congress lenir aser taoba mapang Rajasthan nung Deputy Chief Minister, Sachin Pilot-i, linük nung osettsüset aser chiyungtsü jenjang kanga atuba anema Congress-i lokti senden ayongzükba agütsü, aser Centre nung BJP-i niba sorkar atsüingdokba nung iba yagi tongti shilem agütsü, ta metetdaksü.

Sachin Pilot-i, iba lokti senden ajanga yimtenren nung temelenshi adoktsü aser tarutsü nung BJP jenjang majungtsü, ta osang ka sangdongtsü, ta ashi.

"2024 küm Centre nung BJP sorkar chirepba nung iba ya tongti shilem ka asütsü," ta pai ashi.

Küm tenet tashi junga yimsü masüba atema Centre sorkari telangzükba agütsütsüsa akümtsü, ta pai sangdong ka ajanga metetdaksü.

Ano külen Jhunjhunu nung osangbenertem den jembidang Rajasthan state BJP Tir, Satish Poonia-i, iba lokti senden ya yimtenren nung anemsü ka asütsü; Congress-i taoba state Assembly elections nung nangzükba alibatem atema tama telangzükba agütsütsüla, ta ashi.

"State nung Congress sorkar küm asem ajungtsü. Congress-i nangzükba ama meinyaker aser yazü dang nangzükber. Congress rally ya yimtenren

anemsü ka dang asütsü," ta ashi.

Jaipur nung ayongzükba rally nung Congress Party nung tongti lenirtem- Rahul Gandhi aser Priyanka Gandhi Vadra natia shilem agütsü, ta Honibarnü Rajasthan nung Congress incharge, Ajay Maken-i metetdaksü.

"National rally" nung ya tanga state tem nung party chief minister tem aser taoba mapang chief minister tem-a adentsü, ta pai metetdaksü.

Iba rally nung Congress Tir, Sonia Gandhi bo adentsü asü madentsüar tang tashi mejanga.

Jaipur nung osangbenertem den jembidang Congress General Secretary, Randeep Singh Surjewala-i, Ato kilonser, Narendra Modi-i aniba National Democratic Alliance (NDA) sorkar mapatongtem aser telemtetbatem ajanga linük nung jenjang tupet atur, ta aitsü.

Modi sorkari agiba telemtetba ajak ya nüburtem anemba telemtetbatem lir; demonetisation telemtetba agiba ajanga rongsenkettsüing jenjang tamajungba aküm, ta Surjewala-i ashi.

"Modi sorkari agiba telemtetba ajak ya nüburtem anemba telemtetba lir. Small & medium industries raksaogo. Maoists telungpur tebilemstü, kiralongra mesüra ochimashi sen menokdangtet. Tang linük nung mapa manguba rate shilem 10 kümogo. Modi aser BJP agienang aser jenjang atuba aziökang," ta paisa metetdaksü.

Holly Humberstone-i BRITs Rising Star Award angu



Luchii/December 11, 2021 (Agencies): Holly Humberstone-i BRITs Rising Star Award nguogo.

BBC Radio 1 show nung Clara Amfo ajanga arishi kum 21 tain musician Holly-i iba tetushi award takok anguba osang sangdonga liasü; aser Holly, shiba Bree Runway aser Lola Young na den iba award

atema nominate asü, la nem iba award agütsüba asoshi pelaba lemsatep.

"Küm shia tsürabur den külemi BRITs sentong reprangba yimdangi arur. Nüngtugu artist ana den külemi BRITs Rising Star atema nomination anguba asoshi pelar aser numatanga bilemer. Kidang nungi ken zülua tenzük aser

tanü kü nem iba naroküm agütsüba ya pungmang ama lir," ta Holly-i ashi.

November ita Holly-i la indang tanabuba EP - 'The Walls Are Way Too Thin' saya aser tesüiba ita 12 nungi bilemba ama sentongtem takok ngua aruogo, ta lai ashi.

2021 kum ajangshia arubatem yimdangi arur, Holly-i, "Iba kum tenzük nungi kanga mazüingi inyaka aruogo aser sentongtem takok angutsü asoshi kü maparen nung nungitta yarir ajak dang pelaba lemsateper," ta ashi.

Taoba mapang, Adele, Ellie Goulding, Jessie J, Sam Smith, James Bay aser Jorja Smith nungeri BRITs Rising Star Award nguogo.

BRITs sentong nung shilem agitsüpur rongnung Holly mezüing asütsü ta jangjatsüogo. Rising Star Award ya December 10, 2021 nü agütsüogo aser iba sentong ya sangküm February 8, 2022 nü O2, London nung agitsü.

Iba award ceremony sentong ya Clara Amfo aser Maya Jama nati ketdangsä (host) agitsü aser sentong nung Anne-Marie, Joel Corry & Mabel, Glass Animals aser Mimi Webb nungeri shilem agitsü terenemba lir.

'Oppenheimer' nung Rami Malek aser Florence Pugh denogo

Luchii/December 11, 2021 (Agencies): Christopher Nolan indang taruba project - 'Oppenheimer' nung, Oscar takok angur Rami Malek, 'Black Widow' star Florence Pugh aser actor-film yanglur Benny Safdie nunger cast rongnung anisemogo.

Osang ajanga angazükba agi, actor asem yagi taoba mapang sangdongba cast züngsem Cillian Murphy, Emily Blunt, Robert Downey Jr aser Matt Damon nunger den külemi iba film nung shilem agitsü.

Nolan indang project tasenba ya America nunger theoretical physicist, J Robert Oppenheimer (father of the

atomic bomb) taküm otsü nung ajemdaker yangluba film ka asütsü.

Cillian Murphy-i J Robert Oppenheimer aser Emily Blunt-i pa kinungtsü Katherine ama shilem agiba angutsü.

Florence Pugh-i Jean Tatlock (United States indang Communist Party züngsem) ama shilem agitsü. Safdie-i Hungary nunger physicist, Edward Teller (father of the hydrogen bomb aser Manhattan Project nung züngsem ka) ama aser Malek-i scientist ka ama shilem agitsü lemkükja lir.

'Oppenheimer' ya Pulitzer Prize takok anguba kakat 'American Prometheus: The

Triumph and Tragedy of J Robert Oppenheimer' nung ajemdaker yanglutsü. Kai Bird aser Martin J Sherwin nati iba kakat zülü.

Christopher Nolan-i iba project direct asüba den film atema otsü zülutsütsü. Kasa mapang, Nolan kinungtsü Emma Thomas-i Atlas Entertainment indang Charles Roven den külemi iba film produce asütsü.

2020 kum Nolan indang 'Tenet' film tesüsa sayaogo. Iba film nung John David Washington, Robert Pattinson, Kenneth Branagh aser Elizabeth Debicki nungeri tongti shilem agiogo.

'Pushpa: The Rise' December 17 nü sayatsü



Mumbai, Luchii/December 11, 2021 (Agencies): Sukumar-i direct asüba 'Pushpa: The Rise,' kong Allu Arjun aser Rashmika Mandanna nati tongti shilem agir, iba film December 17, 2021 nü sayatsü. Iba action thriller

indang film unit ajanga takok tulu angutsü teimla lir kechiyong iba film indang 'pre-release business' ajanga crore jenjang nung ajangzüksü ta asadangtetogo.

'Pushpa: The Rise' indang 'rights' ajak ngua lir aser Allu Arjun-i tongti shilem agiba film indang pre-release business ajanga sen cr. 250 jungnüa aazüksü imlar.

Osangtem ajanga angazükba agi, iba film ajanga 'non-theatrical (OTT & Digital) rights' densema sabang balala nungi sen cr. 250 tashi aazüksü asadangtetter. Coronavirus wara tanaben adoker sülen, 'pre-release theatrical business' nung crore menden dak tema aazüksü asadangtetba Telugu film rongnung 'Pushpa: The Rise' asütsü.

Imlaba ama maparen takok angutsü asoshi film dak tuluka keta lir. Tanü tashi, iba film dak sendakba nung film yanglurtemi project ajungkettsüba sentong balala aser film poster sayaba ajanga audience nungi telangzüba tajung nguogo.

Mythri Movie Makers aser Muttamsetty Media longjemer iba film produce süogo. Arjun dak alaka, iba film nung Rashmika Mandanna, Fahadh Faasil, Jagapathi Babu, Prakash Raj, Anasuya Bharadwaj, Sunil, Harish Uthaman, Vennela Kishore, Rao Ramesh aser Ajay Ghosh nungeri tongti shilem agiba angutsü. Iba film atema Devi Sri Prasad-i music yangluogo. Pushpa: The Rise ya Allu Arjun aser Sukumar indang film tasembuba asünung, aikati iba film ajungtsü imlar.

SALULAMANG SENSO MUNG DANG

17th BUBA

Anogo : 18th January 2022

Nükjidong : "Nüchiso nung Telongjem"

18TH JANUARY 2022 MONGOLBAR SENTONG

Mapang : 09:00 AM

- Menden : Okila
- Lai Zünga Sarasademtsü : Rev. C. Alem Senso Missionary
- Tepela O : B. Akum Lemtur Village Council Chairman Salulamang
- Sobaliba Ken ka : Hapang Zünga i/c Lipoktemjen & Lanuyanger
- Tayongzükba O : a. A. Imo Aier Dimapur (7 mins)
b. K. Akang Jamir (7 mins)
- Onük Tejembir : "Nükmen Tasen Nung Senso Ka" : Wb. Dr. R. Imtionen Ao, Dimapur (20 mins)
- Osangtem agitsü : a. Pentet Luden Osang
b. Saisapang Osang
c. Nungtet Luden Osang
- Temzüng Azüing Mapang :
- O Lemtetba Mapang :
- Menden Melepzüng O :
- Menden Melentepa : T. Imo Jamir GCYM Dimapur

CAA anema 'black day' among

Guwahati, December 11, 2021 (Agencies): Honibarnü Guwahati nung Citizenship Amendment Act (CAA) anema black flag rally ayonga agi.

Honibarnü Assam Jatiya Parishad (AJP) aser North East Students' Organisation (NESO) ajanga Shaheed Bhawan nung wako tanak amer lungkak aitba sentong ka agi.

NESO züngsemtemi northeast state tem nung wako tanak asong aser külen AJP züngsemtemi wako tanak amer yimdong sema senzü aser CAA yanglur rongdok.

"Northeast nung lisopurtem temolung nung CAA anema noktakba tangatetba lir. CAA magien tashi onoki ola adokba manentsü. Anungji Assam aser

tanga northeast state tem nung maneni mapa inyaktüsü" ta NESO advisor Samujjal Bhattacharya-i ashi.

CAA anema ozüingi melaba ama lungkak aitba aser ano okadak ken o benoka raraba külemi inyaka aotsü, ta paisa metetdaksü.

North East Students' Organisation (NESO)-i Citizenship Amendment Act (CAA), 2019 anema December 11 nü 'black day' amongtsü telemtetba agia lir.

"Northeast nung lisopurtemi kanga meranga anema nokataka Centre sorkari December 11, 2019 nü Parliament nung iba ozüing agizük" ta NESO-i metetdaksü.

Kohima nung Langpangkong... (TAPAK 1 NUNGI...)

Ano, kasa sentong nung tetushi tejaoker, Wb. Amenba Yaden, MLA-i jembidang,, "tanü asenok kati ka ajungshitepa jungtepa alitsü jembir saka election kodang arudir kati ka majinütepi sükchitepa akümer," ta tekümdangtsü o ka nenshia metetdaksü. "Asenok lokti onsara. Küm piyong meeting kisüing liaka mapabo kecha maka. Marwari nungeri meeting mamener saka mapabo parnokiang inyaker. Asenok Aor lokti ya Marwari nungeri dak tangazüksü aika lir," ta Amen Yaden-isa ajungshi.

Iba Jubilee mung sentong nung Langpangkong Tzükong Mungdang nung tir Wb.

Marsanen Imsong aser Kohima Aor Telongjem nung tir Wb.Chubalepzük Jamir nati Jubilee salem o metetdaksü aser LSTK kimen Wb. P.Talitemjen IAS-i tajungshi o jembia liasü. Iba sentong nungsa asür bilemteta mapang Nagaland Chief Information Commissioner, Wb.Meyioneni agi aser temeja ken ka Kongro Lanurenlai aten. Sentong nung shilem agirtem dang pelaba melepzüng o taoba Transport Commissioner Wb.T.Meren Paul-i metetdaksü. Iba sentong ya KABA nung sannüker Rev.A.Chuba Jamiri sarasademter tenzük aser sannüker Wb.O.Sashi Ozükümi sarasademter takok ngua tembang..

Tai maketerem aibelena... (TAPAK 1 NUNGI...)

Media kari osang tai prokshir anungji osang tejangja sangdongtsü mepishir, ta Yanlem-isa shisem.

Iba lenmang nung check-gate ana lir ta ashibaji tai lir anungji police aser district administration-i check-gate naliba osang tejangja metetdaksütsüla, ta paisa metetdaksü.


"AFSPA ya reshikangshiba, tetsür dak tashiyim agi shi nung medemba aser nisung tepsetba ozüing ka lir. India-i North East ya sepaitem tsükchir den raratsü atema training agidak ka kümdaksütsü makok" ta Yingphe Konyak-ia ashi. "Naga nunger aser North East

ya teküpok jenjang nung alirtem ama züngshiba anentsüla" ta laisa ashi.

"Naga yimten telok NSCN (K) nung 'K' ojang ya 'Konyak' masti saka 'Khaplang' lir" ta Yingphe-isa metetdaksü.

Union Home Minister-i kuli tejangja mebushii Parliament nung osang tai ashibaji atema Konyak nunger aser Nagaland nung alirtem dang tatok meshitsüla, ta laisa ashi.

Honibarnü Konyak Union ketdangpurtemi Oting, Jakphang aser Chi yimtem nung asür kibongtem aser ano Mon District Hospital nung anioka anepalurtem den ajurutepe liasü.



Brussels, December 11: European Commission tir Ursula von der Leyen (tachichi) aser German Chancellor Olaf Scholz na December 10 nü Brussels, Belgium nung osangbenertem den sensaksemba mapang tangokba noksa nung angur. Olaf Scholz aser Ursula von der Leyen na Hokolbarnü ajurutepa liasü.

US-i China, Myanmar & North Korea nem tenokdangba agütsü

Washington, Luchii/ December 11 (Agencies): United States Hokolbarnü China, Myanmar, North Korea aser Bangladesh den sendaka aliba entities aser nisungtem nem human rights dak sendakba nung tenokdangba agütsüogo aser Chinese artificial intelligence company SenseTime Group-a investment blacklist nung bendenloktsüogo.

United States tsüngsü nung anidaka Canada aser United Kingdom-ia human rights dak sendakba nung Myanmar nem tenokdangba agütsüogo. Kasa mapang nung Washington-i tir Joe Biden indang administration kübok tang mezüngbuba North Korea nem tenokdangba tasen agütsüogo aser Myanmar military lenirtem dak rangloker tenokdangba balala agütsüogo.

"Tanü onoki jenjang agiba aser talisa United Kingdom aser Canada den longjemer jenjang agiba ajanga timtem tekangshi bener arutsütsü atema state tashi mashiyimi amshiba anema alima nung democratic linüktemi nokdaktsü ta osang ka agütsütsü," ta deputy treasury secretary Wally Adeyemo-i ashi.

US-i iba jenjang agiba ya China indang telung ken o nung jushiba ka aser international relations inyakim nung aibelena ka ta Washington nung China indang embassy-i ashi.

Embassy otongdar Liu Pengyu-i, iba ajanga China aser US na tesendaktep dak kanga mejungi kongshi ta shia Washington dang parnoki jenjang agiba asadangshitsü mepeshia metetdaksüogo.

United Nations nung North Korean mission aser Washington nung Myanmar

asir Bangladesh embassy temi iba jenjang agiba dak sendakba nung telangzüba kecha magütsü.

Biden-i ayongzüka anogo ana Democracy atema virtual Summit agiba mapang kasa nung iba tenokdangbatem agütsüogo, kong pai alima ajunga nung democracy inyakim ajungkettsü atema sangdongba den United States nung pro-democracy legislation pusemba sangdonga liasü.

Biden-i Hokolbarnü ashiba agi, summit nung alima kin balala nungi lenir 100 dak temai tenangzüktepba yangluba ajanga alima nung tashiyim amshiba nokdangtsü aser ochimashi inyakim anema raraba den human rights ajungkettsü.

Treasury-isa, Hokolbarnü Chinese artificial intelligence company SenseTime, "Chinese military-industrial complex companies," tem indang list ka nung bendenloktsüogo. Item company tem ya Uyghurs nunger jangjatsü atema rangloker facial recognition program tem yangluba atema aija lir.

Iba telemtetba agiba ajanga company ya US investor temi sen mintoktsüba jenjangi aitsü.

SenseTime-i-Honibarnü sangdong ka ajanga parnok nem tenokdangba agütsüba aser aitsüba magizük aser taitüba tem ya tamendakdak mali, ta ashi.

UN experts aser rights group temi Uyghurs nunger aser Muslim nunger million ka dak tema kümtem tsüngda China kübok Xinjiang tesem nung camp balala nung sota lir, ta ashi.

Xinjiang nung nüburtem

reshikangshia amshir ta aitsüba China-i magizük, ajisüaka US sorkar aser rights group temi iba tesem nung Beijing-i kin kar samatsütsü nüjidong nung inyakshidar ta ashir.

Maneni Treasury-i ashiba agi, military nem teyari agütsüba Myanmar military entities ana aser organization ka nem tenokdangba agütsüogo. Tenokdangba agütsür aliba Directorate of Defense Industries yagi military aser police atema prangbong hadir balala yanglutsür, koba military anema nokdakertem azüoktsü atema amshir.

Treasury-isa, Myo Swe Win densema regional chief minister pezü nem tenokdangba aitsüogo. Myo Swe Win ya Bago tesem nung junta indang administration tekolakba lir, kong April ita nung anogo ka nung nisung 82 tepseta liasü.

Canada-isa, Myanmar military government den sendaka aliba entities pezü nem tenokdangba agütsü aser United Kingdom-ia asendenshir military nem tenokdangba agütsüogo.

Ano Treasury-i, North Korea indang Central Public Prosecutors Office, taoba minister of social security aser Minister of People's Armed Forces Ri Yong Gil nunger nem tenokdangba agütsüogo. Treasury-isa, North Korea nungi mapa inyakertem anir aotsü atema teyari agütsüba Russia nunger university ka dak rangloker jenjang agi.

US State Department-i Hokolbarnü China, Belarus aser Sri Lanka nungi ketdangsur 12 United States nung tetsüng majemoktsü atema tenokdangba agütsüogo.

TTP tekolakbai Security force tem amaktsü tetuyuba agütsü

Islamabad, Luchii/ December 11 (TYO): Tehreek-e-Taliban Pakistan-i, ita ka ceasefire nung aliba tembangba Brestostibarnü sangdongba sülen iba telok tekolakbai Pakistan indang security force tem amak tenzüksü tetuyuba agütsüogo.

Audio osang ka ajanga Mufti Noor-i par telok züngsemtem dang Brestostibarnü ayaterem sülen parnok kong lidir idakji Security force tem amaktsü tetuyuba agütsüogo, kechiyong TTP-i Pakistan sorkar mesera teyongtsü nung inyakshirtemi nung kecha osang magazük, ta ashi. Ceasefire ya November 9 nü benoka liasü.

Brestostibarnü aonung ceasefire tembangba sangdongba mapang TTP-i, Afghanistan nung sensaksem tenzüksü mapang nangzüksü ama Pakistan sorkari minyak ta ashi. Parnokisa, Pakistan ketdangsurtemi tepuoker 102 mechioki lir, ta ashi. Osang ajanga ashiba agi, sensaksem tenzüksü mapang Islamic Emirate of Afghanistan ajanga tepuokertem TTP nem bendanga agütsütsü mulungtepa liasü.

Maneni TTP-i ashiba agi,

telok anapronglai formal sensaksem ayongzüka agütsü aser telok anaprongla nungi sensaksemtsüpur pongungu shimtsü mulungtep. TTP-i züngsem pongu agi kümteba committee ka tentetogo saka sensaksemtsü atema Pakistan sorkari sensaksemtsüpurtem meshim, ta kasa sangdong ajanga metetdaksü. TTP-i ashiba agi, ceasefire benoka aliba mapang security force temi northwestern Khyber Pakhtunkhwa province nung tesem aika meita ao aser telungpurtem aika tepsetba den aika puogo.

"Iba amala tia tensa ka nung ceasefire atsülangshitsüji tamakoktsü," ta TTP-i ashi.

Pakistan aser TTP na sensaksem ya tamakok angütsü dang liasü, kechiyong TTP-i Shariah benoktsü aser tribal districts tem lemdangtsütsü ahangba ataloktsütsü ya Islamabad asoshi tamakoktsü liasü. Tribal district tem ya 2018 küm May ita constitutional amendment ka ajanga Khyber Pakhtunkhwa den lokteptsüogo.

2007 küm nungi tenzüka TTP-i Pakistan nung yimden yimsüsürtem, civilian aser security force tem maka arudar.

Tenla agütsürtemi \$280 million Afghanistan nunger nem agütsütsü



Washington, Luchii/ December 11 (Agencies): Afghanistan nung nutrition aser health nongita yaritsü atema tenla agütsürtemi Hokolbarnü frozen, trust fund ka nungi USD million 280 World Food Program (WFP) aser UNICEF nem agütsütsü telemtetba agiogo, ta World Bank-i ashi. Afghanistan nung tang ayawara aliba aser rongsenketzüng chireper aliba mesemtsü atema World Bank-i meranga arudar.

World Bank-i achayangba Afghan Reconstruction Trust Fund ajanga taküm WFP nem food security aser nutrition operations ajungkettsü atema USD million 180 aser tenüngdakba health service tem agütsütsü atema UNICEF nem USD million 100 agütsütsü, ta bank sangdong ka ajanga metetdaksü.

Iba sen ya Afghanistan nung food security aser health program tem nongita yaritsü atema lir, kechiyong Taliban-i August ita sorkar atsüngtokba sülen Afghanistan rongsenketzüng kanga mejungi

aküm aser iba den meimchir temeden dak sendakba nung mepetmesü tulu adok.

United States aser tangar tenla agütsürtemi teyari agütsüba anenba sülen linük indang hard currency assets USD billion 9 dak tema sota ayu.

United Nations-i, linük nung nütsünyongsük million 23 shi yatzüra tia tulu nung lir aser nisung million 9 shi ayawara agi kongshitsü ta tekümdangtsü metetdaksüogo.

Reconstruction trust fund sen aser WFP aser UNICEF ajanga U.N. family anaprongla yagi linük nung tenüngdakba peritsütsü atema inyaka arudar, koba ajanga US-i Taliban nem tenokdangba agütsür aliba dak mekongshir.

Hokolbarnü Reuters-i, tenla agütsürtemi USD million 280 agütsütsü asoshi temelaba agütsütsü akok ta sangdonger liasü. December 1 nü Reuters-i, World Bank board-i iba agency ana nem ARTF fund agütsütsü asoshi pusemogo, ta metetdaksü.



Hokolbarnü United States kübok tesem balala nung yipru lendong nung nisung pezü süogo. Kasa mapang nung yipru ajanga Amazon distribution center-a ka kanga mejungi raksatsüogo.

Maradona indang anütetzü Assam nung angu



Sivasagar, Luchii/December 11, 2021 (Agencies): Football asayar mongin Diego Maradona indang anütetzü, koba Dubai nung auya ama temulung melemi bilemer, Honibar anepdang Assam indang Sivasagar District nung iba anütetzü nguteta liasü aser iba ken o dak sendakba nung nisung ka apu, ta police-i ashi.

Pua alisang ya Sivasagar nungi arishi küm 37 tain Wazid Hussain ta jangjaogo. Maradona-i Dubai semdangba mapang pa

anenzükdak tesem nung Wazid ya security guard ka ama inyaka liasü, ta police sangdong ajanga metetdaksü.

Wazid Hussain ya 'safe' ka auyaba maparen nung dena lir ama temulung melemi bilemer, kong Maradona indang anütetzü (limited edition Hublot watch) aser osettsüset yua lir, ta Director General of Police, Bhaskar Jyoti Mahanta-i ashi.

Iba company nung anogo ishika inyakba sülen, Wazid yagi

tebu manem lir ta pa inyakba company dang osang agüja sodi (leave) meshi aser August ita pa Assam-i shilang, ta Mahanta-i ashi.

Dubai Police aser Indian Federal nati Wazid indang osang agiba sülen, Assam Police-i pa apu, ta ketdangsüri ashi.

Iba osang angashili dang, Assam Police-i Honibar anepdang 4:00 ako meta Wazid ya par kidang lia apu aser pa ket nungi samaba anütetzü nguteta liasü, ta Mahanta-i ashi.

Assam Chief Minister Himanta Biswa Sarma-i Twitter nung, "Asur Diego Maradona indang Hublot anütetzü bushitsü aser Wazid Hussain aputsü atema Indian federal LEA ajanga Assam police-i Dubai Police HQs den longjemer inyak," ta twitter nung lemsatap.

Iba maparen dak sendakba nung pua alisang anema ozüing agi melaba ama inyakogo, ta Sarma-i shisem.

The Ashes: Australia-i wicket 9 agi England kokogo

Brisbane, Luchii/December 11, 2021 (Agencies): Honibarnü, Gabba kübok mezüing Ashes Test nung Australia-i England madak wicket 9 agi takok nguogo. Iba asaya mapang, Nathan Lyon-i Test Cricket nung wicket 400 dak tema agia alizüing tasen ka tongtet. Test asayamung nung wicket 400 tama agir Australia nung rongnung Nathan tasembuba asütsü.

Iba Test anogo pezünübuba nung England team-i teimla yur 220/2 nung asaya tenzükshi. England-i run 297 dang yanglur batter ajak out süadok aser iba Test akoktsü asoshi Australia-i run 20 dang nungdaka aküm.

Australia team tanabuba in-nings nung, England atema fast bowler Ollie Robinson-i dang wicket agi aser tayonger team atema Marnus Labuschagne-i 4'

ka züklokja asaya koktet. Nathan Lyon, shibai tanabuba innings nung wicket 4 (4-91) agi, taküm January nung India-i Australia madak Test koker külen nungi pai wicket 399 dak alaka wicket talila magitetti aru.

Ashes Test anogo tasemnübuba nung Lyon-i over 24 tashi aon, saka Dawid Malan aser Joe Root (England third wicket partnership) nati junga asayaba yong, külem team pur den pai wicket ka danga magitet.

Ajisüaka, Honibarnü Root aser Malan nati run talila asem dang bendenlok, koba Test asaya tasemnübuba nung tenati run 159 yanglur aliba mapang Lyon-i tanabuba over nung wicket ka agi. Arishi küm 34 tain Lyon-i Malan (82) out sütsü.

Iba sülen, Cameron Green-i Root (89) out sütsüba sülen run

11 nung England batter asem tashi out süadok. Taküm England captain Root-i century 7buba aser Australia nung mezüing century yanglutsü meranga liasü.

Lyon-isa Ollie Pope (4) out sütsü. Pope-i ball dak peta ka zükshiba sülen slip nung Steve Smith-i ball ajepzük.

Australia captain Pat Cummins-i Stokes out mesütsüdang, Ben Stokes aser Jos Buttler na sentepa run 32 yanglua liasü. Stokes-i zükloktsüba ball ya ali matongdang gully nung Green-i ajepzüka liasü.

Lyon-i ano Ollie Robinson aser Mark Wood na atonga out sütsü.

England team innings tembangtsütsü asoshi Green-i Chris Woakes (16) out sütsü. Iba innings nung Green-i wicket ana agir asütsü.

Adelaide International nung Barty asayatsü

Luchii/December 11, 2021 (Agencies): Ashleigh Barty-i sangküm January ita Adelaide nung asayatsü tebilemba lir. Melbourne kübok Australian Open nung Naomi Osaka aser Rafael Nadal naprongla asayatsü, ta Hokolbarnü ketdangsürtemi ashi.

Taküm September ita US Open testsür kija tasembuba round nung tsükba sülen, Barty-i tennis asayamung ka nungdanga masaya, saka Australia tsür Barty-i tan season nung title pungo takok anguba sülen 2021 nung la World no. 1 ama tembang.

Adelaide International nung, Wimbledon champion Barty-i 'World top 10' nung Iga Swiatek densema tanüingba asayartem den tokteptsü. Iga Swiatek-i taoba Adelaide asayamung koka lir aser sangküm lai iba title kümzüksü asoshi asayatsü.

January 2 nungi 9, 2022 tashi asayatsü aliba asayamung nung world no. 2 Aryna Sabalenka densema taoba mapang world no. 1 Garbine Muguruza, Karolina Pliskova aser Victoria

Azarenka nung asayatsü terenemba lir.

Top 10 testsür asayar rongnung kati Adelaide nung masayatsü aser laji rank 7buba Estonia tsür Anett Kontaveit asütsü.

Australian Open takok angur, Osaka, shiba world no. 13 nung lir, lai Melbourne Summer Set asayamung nung shilem agitsü. January 3 nungi 9, 2022 tashi asayatsü aliba Melbourne Summer nung testsür aser tebur asayamung atonga ayongzüksü.

Iba asayamung nung Osaka den US Open champion Emma Raducanu asayatsü. Flushing Meadows nung Emma-i takok ngur külen nungi tanga asayamung nung junga masayateti aruogo.

Melbourne nung shilem agitsüpur rongnung Simona Halep, Elise Mertens aser Anastasia Pavlyuchenkova nung dena lir.

America tsür Serena Williams, shibai Grand Slam title 23 koka lir (title ka agi Margaret Court indang Grand Slam title (24) dang nungi tajemba), la

temang nung timtem aliba ajanga lai Australian Summer nung masayatsü.

Tukuben Australian Open champion takok angur Novak Djokovic den Daniil Medvedev aser Alexander Zverev densema tebur tennis asayar timbaka sangküm January 1 nungi ATP Cup, Sydney nung asaya tenzüksü terenemba lir.

Ajisüaka, Spain nung Nadal-i Sydney asayamung nung masayatsü lemtet aser pai Melbourne nung taoba world no. 3 Grigor Dimitrov den asayatsü.

Grand Slam 21 takok angur tebur rongnung mezüing akümtsü asoshi Nadal aser Djokovic na asayamung balala nung toktepa arudar. French Open semi-final nung tamakok ngur külen nungi Nadal-i asayamung timbaka nung shilem magi.

Taruba season atema Australia maodang Nadal-i tan ita Abu Dhabi exhibition asayamung ka nung shilem agitsü tebilemba lir. Sangküm Australia nung asayamung balala atema asayar ajak coronavirus vaccine agitsü imlar.

1buba Winter Futsal League tembangogo

Kohima, Luchii/December 11, 2021 (TYO): Directorate of Agriculture, Nagaland, Kohima-i December 06 nungi 08, 2021 tashi Coraggio School Lerie Kohima nung 1buba Winter Futsal League ayonga asayaogo. Iba League ya "Unity and Fitness" omen nung ajemdaker asaya liasü, ta sangdong ajanga metetdaksü.

Staff züingsem tulu aser tila tsüingda tebandang kecha makai telongjem aser tangatetep nung inyaksü aser iba den külemi temang anepaluba tsütsü ajungmesotsü nükjidong nung, iba League ayongzük.

Iba Winter Futsal League shibangba sentong nung alakteta tejaoker ama Director of Agriculture, M. Ben Yanthan dena liasü.

Maparen takok ngua inyaka aotsü asoshi iba ama asayamung ajanga ajak longjemdaksür ta, Yanthan-i ashi aser iba League meraketa agiba atema pai tayonger dang pelaba metetdaksü.

Kasa sentong nung C. Peter Yanthan, Additional Direc-

tor of Agriculture-i iba League nung takok angur nem sempet agütsü aser Medovilie Ladu, Joint Director of Agriculture-i ken ka tena telok saksalemdaksü. Iba sentong nung N. Jacob Yanthan, Joint Director of Agriculture menden liasü.

Administration & Establishment section-i 1buba Winter Futsal League 2021 kokogo aser Budget & Accounts section-i runners up jenjang ajangzüketet. Iba League nung takok angur ajak nem senpet agütsü. Kasa mapang, iba League indang 'Best Player' aser 'Highest Scorer' nem award agüja liasü.

Ibuba Winter Futsal League nung team pezü - Planning & ATMA Section, Programmes & Engineering Section, Budget & Accounts Section aser Administration & Establishment Section temi shilem agiogo.

Iba League shibangba sentong tembanga, Winter Futsal League indang Organising committee, Ronchamo Kikon-i tepela anküp o jembi.

Asian Rowing C'ships: Arjun aser Ravi nati gold medal angu



Bangkok, Luchii/December 11, 2021 (Agencies): Honibarnü, Asian Rowing Championships 2021 - tebur tarep 'sculls' asayamung nung India nung Arjun Lal Jat aser Ravi gold medal angu.

Rayong kübok Royal Thai Navy Rowing Center nung men's doubles Sculls tetoktepa nung temaba jenjang tongtettsü atema India nung tarep yagi China nung Qing Li/Lutong Zhang aser Uzbekistan nung Davrjon Davronov/Abdullo Mukhammadiev madak takok angu.

Iba rowing tetoktepa nung, Arjun aser Ravi nati 6:57.883 nung alizüing tongtet. Kasa mapang, China nung tarep yagi 7:02.374 (silver medal) aser Uzbek nung 7:07.734 (bronze medal) nung alizüing tomgtetta

liasü. Kasa asayamung tebur kija sculls' tetoktepa nung, India nung Parminder Singh-i (8:07.323) silver medal angu. Uzbekistan nung Kholmurzaev Shakhboz-i gold medal (7:56.307) aser Indonesia nung Memo-i bronze medal (8:10.055) angu.

"Asian #Rowing Championships 2021, Thailand nung @OLYArjun den #Ravi nati M2X Men's Double Sculls event nung (06:57.883) gold medal angu. Kasa mapang, MIX Men's Single Sculls event nung #ParminderSingh-i (07:56.307) silver medal angu," ta Twitter nung SAI-i lemsatap.

Deobarnü, India nung rower temi asayamung pungo indang final nung tokteptsü terenemba lir.

BILEMDANGANG

"Yimjak nung ochi tuteta jembirtem Tsüngremi tejenbulen lenmang renemtsür."